

四庫全書

集部

欽定四庫全書

文氏五家集卷十二

明 文肇祉 撰

錄事詩集

五言律詩

侍大父過王二丈履吉越溪莊

隨翁訪叔度放棹越溪深
竹徑數椽屋桑園十畝陰
汲泉頻洗硯促膝坐鳴琴
高士平生慕今朝慰夙心

汪子木園與薛用傳施安卿明卿陳子白文會

名園啓文會統屋樹交加捲幔窺新燕臨池看落花樂
耽長統志書效子雲家竹裏輕煙出軒前試煮茶

野望因過楞伽侃公精舍

野曠山藏寺祇林一望中諸天懸采翠殘照遲晴空松
下疏精室簷前聽晚鐘欲耽清淨賞隨喜訪支公

石湖

湖光披白練日夜泛青簾帆影鏡中落鷗羣沙上眠楞

伽山裏寺茶磨晚含煙羨殺鴟夷子飄飄去不還

蔭白堂即事

結屋近清嘉虛堂背郭斜門閒人問字簾捲鳥啼花盛
世容踈嬾端居戀物華齋頭書滿架不羨子雲家

早起

曉起露光沃熙微景物鮮窻間蠅擊紙庭際草含煙短
髮頻看鏡殘星猶在天虛齋絕塵想坐久意澄然

月夜與王明度明善登文筆峯

晚來秋雨霽山月向人高同上留雲閣因攀栖鶴巢詩
聯林外句幘岸醉中豪獨立羣峯下天風吹鬢毛

讀書楞伽寺松風閣

重來湖上寺借榻上人居月色侵虛閣松聲和讀書攬
衣驚鼠下開卷試燈初萬籟一時寂鐘推更漏餘

雨夜與吳元定朱日宣范子潤王玄靜袁振伯集

石湖草堂

晚步山中寺堂開萬竹林清宵一把盞細雨共論心秉

燭成懽會高歌傳谷音佛前禪誦息遙聽磬聲沉

天平山謁范魏公祠

入山人境隔古寺白雲留萬笏齊青漢斜陽下石丘義
田存後裔勲業慰先憂尚有泉清冽濺濺一脈流

餞馮信伯杜與言會試

小集樓居好開窻新捲簾名推馮奉世聲重杜樊川二
妙忽同至一杯行色前行行曲江上更喜得春先

過陳丈白陽田舍留集浩歌亭

種竹開三徑編籬翠作屏憐公千載調憶別兩秋螢杯
盞香醪白盤食菜甲青因過問奇字醉卧子雲亭

外舅召復翰林兼司經局校書

當代青宮輔如翁獨異才校書供閣直補袞代天裁名
譽留東觀文章落上台輞川空別業未許賦歸來

寺遊同王玄靜正上人

野寺羣峯裏藍輿一逕通窻開飛瀑外殿落翠微中饋
饌延過客繙經叩遠公慚非蘇晉侶玄覽得相從

黃約之慎之招飲書齋

江夏聲華舊君家譽望宏獨憐千古調喜得二難并方
館開嘉讌庭梅吐玉英寒宵須秉燭月上已深更

虎丘

出城將數里塵土離人寰遠見林端塔來登寺裏山雲
飛千頃碧石點一臺斑簫鼓中流起白公堤上還

楞伽寺湖山樓同朱日宣王履均王玄靜侃朗二
上人晚眺

湖上知名寺樓臺倚碧岑法堂虛枕簟狂客散冠簪塵
劫空中滅鐘聲靜裏沉方知禪可托共禮白雲深

秋夜王吏部錄之文招飲

吏部聲名久堂虛客到稀舉杯留夜酌邀月弄清輝露
沃天香襲談霏玉麈揮清朝思報答明主正垂衣

毘陵舟中約陸子行韓承孚從陸入京

雷聲喧夜泊早已過毘陵驛樹隨溪度蓬窻帶雨凭語
音時漸別壯志欲騫騰明日丹陽郭肩輿擬並乘

丹陽

早發丹陽道行行路轉賒聽雞過野市並馬踏槐花酒
肆青帘接茆茨綠水斜征途知不遠明日到京華

高橋門

秋風吹鴈影佩劍斗光寒輦路飛塵遠橋門勒馬看青
宵雙鳳闕黃屋五雲端題柱平生志何時上禁鑾

姚元白市隱園借榻

禁城藏別業披莽似郊坰沼引秦淮碧山排鍾阜青竹

光分曲逕秋影瞰虛亭下榻市喧息林扉盡日扃

雨花臺

金陵山水勝佳麗是城南法雨飛空磴天花散碧潭
明光曾杖錫太白有吟菴行到煎茶處泠泠玉一涵

徐魏國園亭

麟閣勲庸冠金貂寵後昆水漿浮碧椀槐柳蔭重門
池泛青簾舫堂開白玉樽笙歌時不徹月上已黃昏

葉魯生書齋

結屋近山塘柴扉護短牆
野花開竹徑湖石磊山房
室淨生虛白窗明榻硬黃
晚來人散後獨自引壺觴

九日不出

一秋慚失意九日廢登臺
菊為佳辰發懷從濁酒開
哀蟬猶夕響征鴈向南回
時序愁中改城高砧杵催

君山與黃吉遠望

石徑攀蘿上風松山半亭
天浮江共遠沙積水俱渟
海蜃吞銀闕秋煙虛翠屏
春申遺像在吾亦薦溪萍

大父玉蘭堂小酌時將奉侍家君應試南畿

吾祖已垂白堂開聚德星衣裳動雲氣杯酌吐玄音喜
共趨庭日那堪駕遠臨歐公倘相遇蘇氏惻初心

侍家君同黃子旋杜與言過龍門得二鯉家君賦
詩因命作

鼓枻龍門上驚看雙鯉跳錦鱗初出水鰭鬣欲騰霄霜
刃霏花白松枝帶葉燒欣然一餐飽把盞自通宵

焦山

山寺猶存姓門寒古樹停丹臺雲氣紫蓮閣寶光青未
辨華陽逸空餘瘞鶴銘登臨吾已倦慙慙海雲亭

登金山

波心千古寺日夜一峯浮草色分江岸潮聲帶海流月
高人返棹更靜水鳴樓欲坐金鰲閣攀躋最上頭

出場月色如晝侍家君至顧尚書園登見遠樓

長安秋過半乘月上危樓星斗中天燦乾坤萬里周漏
傳金闕迥桂瀉玉杯浮坐久忘言處臨風起暮愁

江上懷張幼于

獨卧吳淞上令人憶季鷹詩篇憐敏捷志氣羨飄凌天
末雲千疊江頭月半梭軍麾今滿眼音問阻親朋

太湖

太湖八百里七十二峯縣震澤禹功遠洞庭仙蹟傳波
翻沙際鳥石繡鏡中蓮煙水秋來濶平吞萬里天

黃子旋宅會文

清嘉風土淨華館晝沉沉選日開文讌良辰會盍簪追

隨期辨志相與共論心
亭際無塵雜松聲奏雅音

春晝

午睡酣初醒日斜花影移
夢回烹紫笋几淨寫烏絲
乳燕窺新竹文魚漾淺漪
問奇人去後一任掩茆茨

杜與言登衡嶽回鴈峯有佳什見寄

回鴈峯頭坐新篇寄舊知
憐君遙念想動我故鄉思
南嶽開雲處高樓待月時
此時一壺酒誰與共傳卮

過孔加丈蕉露館

高人多道氣曉啓碧窻寒摘葉供書寫研朱點易看霏
談揮麈尾遠興薄雲端相對渾無語須教杯盞寬

陸壽如陳懋吉過射涇田舍

秋暮初收穫香醪已自開江頭新雨過溪上故人來簡
畧忘幽僻輝光動草萊論文真不愧竹徑日徘徊

牛首山

下馬獻花處千巖秀色連乘風吹晚步披莽上山巔神
宇江流遶禪房塔影賒夜深催擊鉢詩就不成眠

靈谷寺

山寺度門遠松寒十里陰鐘樓苔蘚合閣道雨花沉泉
咽山中路人傳空外音歸途未忍去猶自戀祇林

秋宵月下懷張叔貽

獨坐空庭下涼風入袂吹起看新月上忽動故人思驚
鵲栖還定高梧影漸移壯圖愁未立青鬢已絲絲

休休菴

高士蒙山老市廛精舍開何如岳壑趣俱入戶庭來法

雨飛禪逕天花下講臺雲書遺一匣玄悟少人推

覽鏡

覽鏡對愁顏西風秋雨零慚看新白髮猶著舊青衫酒醒難成寐詩裁不用芟辭巢雙燕子空自語喃喃

過呂梁王水部茂行邀飲

境入呂梁勝水縣洪上頭狂瀾思一障巨石伏中流樹接江淮遠雲連齊魯浮才名王水部攜酒上蘭舟

題百穀半偈菴

高人愛精潔築室學逃禪半偈題菴額長齋坐佛前架
頭齊古帖簷下起茶煙筆硯閒緣在時還對簡篇

大父書至云周孫得子於我為玄孫此是家門之
慶也賦詩志喜

昨夜燈花吐書來喜得孫高玄看五世閭里賀盈門繩
武培前業貽謀有後昆吾翁當此際燕賞倒金尊

讀書吕公祠

滿眼江南景芳祠綠樹遮苔花侵畫壁旭日射簷牙四

座虛堂敞一灣流水斜晚來橋上望明月照蒹葭

舟泊潞河遇雨

無媒辭魏闕潞水滯歸舟一夜溪頭雨千林樹作秋鄉
心頻入夢蓬底轉生愁不為琵琶泣青衫淚自流

見新月

去國未千里俄驚近德州仲秋纔二日新月已垂鉤影
逐斜陽下光隨過雨收一年前此際結伴五陵游

夢長安

旅食京華久風塵興已闌出城逾半月猶夢在長安未
遂金門隱空思玉宇寒不知行路裏還作未歸看

山齋雨過新涼襲人夢中有作起而足成之

一雨祛煩暑虛齋竟日涼簷前殘溜滴庭際晚花香簾
捲風吹鬢雲開月在牀睡來多爽氣夜短夢偏長

春盡

春盡園林寂風來水弄漪自開南畝際誰寄草堂賢室
靜生虛白門閒有問奇吾能委窮達聊以慰遐思

塔影園次皇甫司勳

鑿池來塔影結屋倚山阿疑是浮員嶠翻同瀉翠娥昔
聞挂青漢今倒暎渟波惠我驚人句賡酬奈拙何

附司勳詩

因山開別業幻跡在南阿暎水疑浮鷺臨妝似影娥綦
詩咏青漢竺偈頌澄波牛首君登未窻間校若何

嶺南黎維敬寄書至

不才人共棄高誼爾偏求一自吳門別三經炎海秋拂

衣還挹袖

名軒

涉水訪浮丘
兩地懷思切
何時得卧游

晉江蔡少叅別有十三載月夜過訪又別

久與蔡經別
俄驚訪釣磯
乘風來九曲
帶月扣孤扉
握手談疇昔
登山思逸飛
飄然解維去
佇望獨依依

早朝後遇雨

初旭射金扉
朝霞護紫微
輕煙迴御輦
細雨濕朝衣
仗逐蛟龍轉
班隨鴛鴦歸
天家膏澤遍
苑樹綠陰肥

署中官舍書懷

出城七十里一望路迂賒雞犬村邊塢桑麻樹裏家
民居環署治風土亦清嘉官舍無塵雜高槐映碧紗

秋日早朝

雙闕千官集平明曙色微聽殘清禁漏初啓掖垣扉
劍佩聲成韻旌旗露下晞自慚通籍晚敢謂素心違

乞休

腐儒通籍晚潦倒媿生平官署依村市朝參入帝城
奔馳頭盡白辛苦事無成今日乞閒去歸舟日夜行

清江浦追憶沈虞部

一入新庄閤令人無限思窮愁文與可空憶沈
佺期掛劍慚無處遺金感昔時心香聊一炷飛淚薦江蘼

秋暮

夕陽閣西嶺秋色亂川中衰草猶餘綠殘荷撼碎紅浮
生元自寄歸老慊余衷忽聽漁舟笛溪頭弄晚風

山居追和羅太史

卜居依虎阜茂苑卧文園心會禽魚樂門無車馬喧塵

中三十載歸悟五千言杜甫愁行役常思晚計存

附羅太史詩

平居無雜慮所志在丘園種竹非醫俗耕山得避喧年
多知物候春近卜禽言豈不營朝市謀生各有存

和袁魚叔喜雨用韻

今歲旱何久令人生隱憂通宵雷雨作殘困鬱蒸收倚
檻花枝重迎風燕羽柔山齋聚良友五月類清秋

張伯起同王玄靜吳恭先攜榼過塔影園

林卧春方盡簷前鳥鵲喧羣公將小艇攜榼過丘園握手談陳迹澄懷悟道言溪頭相別去歸獨倚南軒

伯起有詩次韻

林花落未掃好鳥尚求聲忽枉故人駕依然舊日情題詩叙離別促席話平生何日重過此相期待月明

雪中閉戶不出

去歲冬無雪今冬雪早飛因風飄上箔帶雨潤沾衣入夜寒仍重推窓晚更輝村中僵卧者竟日揜柴扉

到園

歸來三閱月今日到園亭剪伐亂荆棘重修新竹屏鄰
牆過濁酒晴鵲噪閒庭依舊草堂在北山空勒銘

雨過入山莊

一雨連三月園林久不來盈池環綠水繞徑長蒼苔鸚
鵡褰簾語薔薇滿架開心閒無一事重葺舊亭臺

避暑山莊

城中如在甌避暑到林堂近水樓臺迥開窻枕簟涼銜

杯同阮籍高卧傲羲皇箕踞科頭坐山深白晝長

久雨

夏秋連月雨日日掩柴荆簷溜窻前滴班鳩竹裏鳴香
焚凝淨几茶焙煮砂鐺何日開樽酌中庭待月明

新晴即事

久雨不出户秋來日日陰今朝將野艇出郭過園林水
漲橋梁沒堂開竹徑深閒居無雜慮消盡市朝心

雨霽

三月雨不歇苔花滿徑生經時不出戶今日喜新晴庭
際無塵雜簷前有鵲聲何時將小艇坐看晚霞明

九月

九月已將盡園林景物嘉草堂三歲別脩竹萬竿斜野
鳥間關語芙蓉爛漫花間居無客至汲井自烹茶

釣魚撈蝦以供午食

䟽礪洗塵沙澄然水一窪呼童拋釣餌著屐自撈蝦煮
飯舂香稻烹茶汲井花欣然無一事憑几讀南華

山莊

倚杖入山去山園村逕通嵐容開晚霽塔影卧池中籬
落野花碧枝頭霜柿紅小庭看月上鄰笛起牆東

出郭

一雨連三月今朝天喜晴聞移書畫舫出繞闔閭城晴
色開山霽溪流與岸平民廬俱沒盡觸目揔傷情

人日

開歲已七日清晨煖氣回郊園亭樹迥人日草堂開寒

勒梅枝瘦雪殘新水來有懷吟不就取次試新裁

春日書懷

春來風日好放棹到山莊雨過花枝媚
汎添燕壘香青山露牆角新水漫池塘
獨坐無人至茗杯聊自嘗

初夏

初夏山莊好園林風日嘉閉門時晏起
翹水試新茶雨細魚吹浪風微燕蹴花
草堂空寂寂竹樹自交加

目省

目青不出戶
麥秋天氣寒
鳥聽枝上語
花似霧中看
累月惟高卧
經旬不整冠
心間人事少
容膝易為安

五月

園林亭館靜
仲夏綠陰微
乍暖荷香滿
新晴梅子肥
碧雲將雨過
紫燕引雛飛
竟日無人至
呼童掩竹扉

園亭

春色已過半
山園晝掩門
池平榆莢雨
酒賞杏花村
簾捲几初淨
香殘火尚溫
地偏人蹟少
用拙道應存

過周公瑕支硎山房

吳王賀九嶺西去有松關鳥語屋頭屋雲橫山上山翻
疑隔塵世別境非人間樽酒共斟酌乘興夕照還

又

不見故人久相逢意共欣盤食多海物棐几有壚薰簾
色浮香帶草名波光寫練屨羅含亦有宅遙隔數重雲

曉山

月流墮西漢巖樹散鴉羣曙色初分處樵歌已漸聞仰

看松頂路半是隴頭雲頃刻朝曦動晴開錦繡紋

經闔塘


不到闔塘久俄驚二十秋村墟猶歷歷日月去悠悠古
樹埋蒼蘚少年新白頭門前一灣水依舊向西流

吳淞之水

皆西流

新厯

兩年十月朔頒厯五雲邊今日歸林下猶思拜陞前重
看新歲厯自喜樂餘年獨坐間無事焚香結靜緣



文氏五家集卷十二

欽定四庫全書

集部

文氏五家集卷十三

四

詳校官中書臣陸湘

侍讀臣孫球覆勘

總校官檢討臣何思鈞

校對官庶吉士臣潘庭筠

謄錄監生臣薛振基

欽定四庫全書

文氏五家集卷十三

明 文肇祉 撰

錄事詩集

七言律詩

綠苻村莊簡城中諸友

數椽茅屋倚江開
門徑蕭然長綠苔
出郭清閒塵事少
經旬時斷故人來
滿池鷗鳥窓前浴
夾岸桃花柳外栽

寄語城中舊知道小詩隨手報新裁

同杜與言瞿德徵登茅山與言病不能從而余與
德徵直躋絕頂時夜將半殿簷星月可摘歸至山
腰惟見燈火輝煌笙簫合響真仙境也捨輿而步
詩以紀之

遙望三峯橫紫煙藍輿屈曲似飛仙華陽洞口泉聲合
貞白祠前草色連子夜朝元星可摘半空聞樂月低懸
尋真不覺歸途遠一帶松濤欲曉天

與葉曾生黃子旋陸壽如金時章陳楸吉杜與言
趙凝甫會文于馮信伯樓居

郭外山塘近市廛層樓高棟接雲天飛花點點時沾硯
鳴鳥嚶嚶窺捲簾欣賞奇文頻檢閱剖分疑義試窮研
明時會聚同心友賦就河東獻陛前

秦淮夜泛

秦淮灩灩雨初收結伴沿流夜放舟月轉柳梢人候渡
雲移沙渚樹回洲簫聲近水龍吟細河影橫杯琥珀浮

醉去側身天地小
卧聽潮向夢中流

喜倭寇平携妻孥躬耕射涇田舍

海上三年寇橫行
好音慰我已收兵
即攜妻子還田舍
重載琴書出郡城
聖世喜聞歌夏武
材官今見答昇平
但求處處銷金甲
帶雨牽犁日課耕

項子長邀集煙雨樓

重來構李暮春時
煙雨樓開近水湄
飛燕浴鳬沙漠漠
新蒲細柳碧差差
吾生事業慚文可
君等聲名似項斯

倚檻臨流無一事停杯分韻賦新詩

崑山傅氏園

偶過名園風日嘉
編籬護室樹交花
開窗拂几頻揮麈
汲井臨軒試煮茶
萬斛天香涼雨過
一枰棋局篆烟斜
主人知是商霖後
肯負明時閱歲華

集顧文康公園亭

相國園亭木萬章
昔時幾度醉瑤觴
四圍穿沼游魚躍
數頃當門晚稻香
北望青山開爽氣
東臨綠野印斜陽

郎君方擬明時用付與閒雲護草堂

燕子磯

殿宇參差倚翠厓
碧桃開處有仙家
半空濤雪當軒舞
滿目春帆帶雨斜
江草含煙連斷岸
柳風吹絮颭平沙
何時借榻虛亭裏
早服簷前一片霞

觀音閣

曲磴層巖擁殿臺
朱宮斜瞰大江開
桃花翻浪江豚上
石壁停雲山雨來
時倚曲欄瞻貝闕
醉眠芳草夢蓬萊

浪遊十載經過地此日登臨獨暢懷

衡翁示肇孫北游太學

阿翁九十苦鍾情倚杖那堪送汝行
壁水去游天子學春風須聽上林鶯
壯途初發千山仞雅志無忘萬里程
三百年來忠孝在慎言毋潰舊家聲

泊楓橋用大父韻

辭親遠別動離情滿幅風帆帶雨行
水長關河無阻道春深柳陌尚聞鶯
輕拋故國三千里細數遡征第一程

此夜維舟不成寐寒山依舊起鐘聲

唐職方邀登金山命諸將官射潮

萬古江心湧殿臺高賢雅會得追陪迎潮落羽蛟龍避
簸岸飛濤天地迴報答昇平諸將事挽回滄海使君才
歸舟日暮心偏壯極北紅雲是上台

長安市得蓮硯寄吉水羅太史石蓮洞中

舊硯渾如玉版蓮墨花狼籍紫雲鐫時凭几披香潤
想摘金莖滴露研題稱洞名存古制天完山骨得長年

須令洗淨京華土寄與高人日草玄

秋夜借榻胡太史楸禮嘉樹館早起有詩見贈次

韻奉答

滿架圖書一榻空小庭花影上簾櫳眼前踈嬾無如我
海內文章誰似公一派笙歌人靜後萬家砧杵月明中
夜長酒醒難成寐睡起窻間日已紅

附胡太史詩

風歛微雲淨碧空松聲和月到房櫳却疑窺戶懷安道

絕勝登樓對庾公四海交游投轄處百年心事把杯中
良宵聚晤真難值莫訝頻挑燭影紅

立春日嚴相公招直閣中賞紅梅恭遇上賜春盤
御酒拜嘗賦詩以謝

晴日辛盤出上供青絲玉碗護黃封雪殘鵲鵲春回早
花暎蓬壺色更穠紅日近窻凝瘦影煖風吹酒暈寒容
願公厚養和羹味長伴仙桃醉九重

韋園同姚元白胡楸禮送姚太史左遷

韋園開遍滿庭花相送姚崇去路賒
忍見仲舒辭闕下愁看賈誼謫長沙
左遷暫去趨紅幕內召還來侍翠華
更盡一杯燕市酒那堪回首各天涯

徐李二相公留飲直閣

直閣朱扉傍苑開幽風殿轉過南臺
珍盤遠自中厨出法酒傳宣內使來
頻下南洲徐孺榻時銜北海李膺杯
同心推食欣殊遇何幸追陪近上台

遊攝山栖霞寺

晚過名山整解鞍萬松深處俯清湍斷碑小篆題陳額

古佛千巖蝕蘚斑春茗試烹紗帽側峯名石蓮翻出鹿泉

寒

白玉泉冒
出石蓮井

何時借我僧寮裏閒取楞伽帶月看

龍節推寄胡太史楫禮書至

漫世虛教俗眼看敢期垂問到江干一尊常醉山花笑
萬慮都消宇宙寬忽報遠傳銀字帖翻思高處玉堂寒
故人不解余心事一紙空煩寄熱官

姚元白官舍侍家君夜集因寫小圖紀興

論交廿載鬢蒼浪握手高歌指建康
豪興漫沽燕市酒風流猶說少年場
龍蛇沒落嬰塵網猿鶴驚猜憶草堂
雲裏鐘聲度雙闕月明寒夜話偏長

寄謝羅太史

昔日青宮輔導臣今歸蓮洞葆玄真
八行遠寄三千里

一別俄驚十四春

丙午抵
巳未

豈有虛名流藝苑不虞推譽

動高人燈前夜色興懷處兩地相思益愴神

宿瑯琊寺追和韋蘇州韻

繫馬瑯琊古碕灣寺門深寂倚豐山試邀月向亭中望
誰似雲歸洞裏閒虹影倒垂環駟外泉聲飛出萬松間
一宵借榻逢僧話又逐征鞍度曉關

重游西山自弘濟院轉出登五花閣

薜蘿深處玉虹流錦石踈花曲磴幽禪境未追蘇晉侶
煙霞即似庾公樓凭欄遠送千峯雨高閣猶疑五月秋
欲卧名山談釋部只愁凡骨異玄丘

大宗伯南充王師有詩贈行次韵為答

西風羸馬出城東
滿目離愁落照中
塵世百年心獨醒
江湖數載鬢雙蓬
敝裘懸結思歸切
操瑟空慚有意工
負教孤恩真潦倒
可能復夢大槐宮

附王公詩

剖符曾向五湖東
已見為儒多士中
二十年餘重會面
三千里外又飄蓬
傳家節操心逾厲
奕世文章體更工
歸去好應修舊業
賦成還獻大明宮

恭候聖駕幸成均

玉輦傳宣下禁鑾
輻星門啓曉鐘殘
旌旗影拂蛟龍動
劍佩光凝壁水寒
日上雲裘開五色
仗分馳道擁千官
青衿何幸躬逢盛
喜得今朝對御看

聽講

仙仗平分日月懸
天香飄拂御爐煙
橋門環擁千官肅
槐樹陰濃夾道連
坐論尚遵周典禮
授書開講禹謨篇
君臣克艱愚生欣喜遭殊遇
何幸躬瞻玉陛前

立秋逢七夕和張伯起韻

久雨山齋掩薜扉
雨晴新月一鉤微
卧看天上雙星度
又見庭前一葉飛
貧似阮咸難免俗
賦如永叔和應稀
回思帝里承歡處
猶著斑斕戲綵衣

宿馬林

雪積寒林深復深
肩輿隨處繞車聲
西風古道過羊巷
落日孤村宿馬林
四壁有詩題徃歲
百年無計憫初心
寒雞野店聲偏早
一夜無眠獨擁衾

清秋

清秋一月廢梳頭落盡槐花雨未收詩句長從無意得
功名元忌有心求人多憎愛何須校天賦踈慵不解愁
萬事不關心似水還將生計付沙鷗

過寶應訪朱子价不遇

十年一別問何從此夜維舟又未逢夕照斜翻山帶閣
月明遙聽竹西鐘思君淮海維揚俊媿我江湖汗漫蹤
見說一麾方出守朱雲溪屋白雲封

同家弟訪顧克承

雨過閒行訪辟疆東風茅屋竹圍牆柴扉盡掩知君出
圖畫翻看笑我狂空徃不須題鳳字重來還擬續爐香
茗杯棋局堪忘世不羨當塗日夕忙

自遣

日臨閣帖學羲之時有閒人過問竒非為避喧成小築
只因踈嬾畏趨時貧能尋樂愁俱遣年欲瞞人髮不私
數卷圖書香一縷茶甌初歇試彈棊

京邸移居

明世羞為失路人帝城風物自淒清客心又向移居見
歸思偏從逆旅生
整止飛鳥棲未定
統簷晴鵲報新成
飄零即是羅含宅
蔬食鶉衣敢厭貧

朱將軍宅燕集憶忠熙公

寶善堂開倒玉樽
綠槐依舊擁朱門
不妨垣瓦從殘草
猶見金貂寵後昆
細聽歌聲翻白苧
獨留月色照黃昏
感恩門下當年客
雌伏雄飛幾尚存

穀日立春

帝里慚為久住人五雲樓閣接楓宸喜占穀日逢晴日
信是看春不當春間對茗杯元有味老於筆硯益相親
何時覓取歸舟去谷口躬耕學子真

雨中秦評事攜酒見過

失意逡巡且未迴強携栖止帝城隈
媿將白眼看人醉
愁見黃花冒雨開
九日未賡邠老句
兩都空負孟堅才
殷勤喜得秦評事
携酒衝寒為我來

嘉靖癸亥舟泊廣陵南充王師出訪留三宿甲子

至日復泊於此王師又留數日今萬厯己卯至日
亦於此繫舟而王師致政已十有一年矣撫景興
懷不能無感

兩度揚州逢至日今逢至日又揚州百年真媿長為客
一處曾經幾繫舟鄉土不殊人事異天時無改歲華流
廿橋明月人何處撫景興懷滿目愁

元旦不出

傳呼車馬放朝回獨掩衡門晝不開春帖嬾尋詩句寫

辛盤飮候故人來從知白雪難為和未見黃金再築臺
作伴還家何日是滿園桃李待移栽

自菱湖歸泊峴山月夜泛碧浪湖

雨晴重到峴山前萬頃湖光月在船塔湧奎文移北斗
峯浮螺黛落遙天漁歌遠向煙中起帆影翻從鏡裏縣
酹酒臨風堪寄傲醉來真欲挾飛仙

毘山訪潘子不遇

郭外毘山虛翠屏潘炎別業鬱喬林雲深未辨即君谷

春半不聞山鳥音
小艇暫維桑塢下
重門深鎖草堂陰
去因興盡來乘興
輸却當年泛剡心

夜泊垂虹橋有懷家弟

片帆東下向湖州
夜泊吳江憶舊游
前歲不堪人送別
新年重見月當頭
寒侵孤枕回殘夢
風引晨鐘到客舟
出處關心慚蹭蹬
天涯鴻雁動離愁

過江

數載奔馳上國游
又攜書劍過江頭
樓船簫鼓中流發

殿閣煙嵐曙色浮滿目風濤連海嶠一枰棋局報瓜州
同行喜有王摩詰不羨當年李郭舟

申相公過訪

奔走風塵歲月遷卜居人境地應偏蕭齋喜有高軒過
曲巷傳呼駟馬旋公位日尊心愈下吾才元拙志空堅
無聞剡薦雄文似賦就長揚媿有年

附申和韻

漢廷才子競超遷閉戶憐君寂莫偏車有鳴騶還自媿

門無題鳳只空旋凌雲共道長楊就用世寧同大瓠堅
射策公孫休恨晚平津猶及拜恩年

姚少宰以經筵賜讌招飲席上口占奉謝

鐘鼓餘聲御講堂論思啓沃侍明光雍容日馭聯南極
次第珍盤出上方列鼎羨君稽古力賜醕呼我故人嘗
大烹推食同姬旦為誦春風湛露章

附姚和詩

樗材重忝侍明堂三載長瞻日月光啓沃敢期希傳說

滑稽端不似東方近臣寵渥君休訝謫吏風塵我備嘗
吳苑逕荒頻入夢沐恩難上乞休章

清重誰云白玉堂淺才亦屢荷恩光經陳東壁圖書富
饌出天厨貢物方法酒攜歸邀上客八珍入坐媿先嘗
醉來感我茹茅興願以緇衣作講章

徐侍講公望有詩嘲余不歸舟中偶閱唐人春賦
秋還之句因足成之聊以自適非解嘲也

春賦秋還計已違故人笑我獨歸遲空懷鴻鵠志千里

暫假鷓鴣栖一枝出處有關吾道在伶俜還許舊交知
今朝作伴還鄉去真是仙舟晚更移

夢先大父

吾祖頻頻入夢中昨宵有夢又追從提攜無異當年愛
談笑依然舊日容玉聲音餘桐館靜碧山寒瑣白雲重
覺來枕上飛雙淚月落長安上苑鐘

劉錦衣宅與莫廷韓梅客生李世延得還字

獻書不報又空還點檢行囊早度關會飲金吾投轄地

高燒銀燭照愁顏分題授簡裁新句沉醉醺疑在故山
他日功成如訪我虎丘南畔屋三間

汪學士子聲文過訪話別

一見故人情自親相逢重別十三春杜陵借榻論文處
翰苑懷思入夢頻舉世幾多青眼在舊交猶恐白頭新
明朝又向都門別誰是汪倫情最真

趙太史以賜糕分惠兼餽香秔新米

我愛風流文敏公高標玉立意雍容曾授一疏關千古

能以危言動九重帶雨遠頌香稻粒賜糕分惠紫駝峯
閉門一醉渾無事高卧遙聞禁苑鐘

和杜子庸春雪詩

讀罷故人春雪詩雪花五出覆茆茨自憐冀北非吾土
遙憶江南遲爾思回首先迷鵲鵲觀流澌凍解鳳凰池
何時覓取歸舟去笠澤溪頭理釣絲

送董刑部之萬全

漢代文章重董生許身元是比南金孤忠何止關軍國

一疏真能格帝心
邊境遠隨秋鴈去
聲名高共暮蟬吟
應知不久虛前席
詔許還朝雨露深

嵇職方雪中招飲縱觀法書名畫

獨坐山齋寒色侵
雨絲吹雪擁衡門
多情喜得嵇中散
折簡來呼文可孫
畫出名人題最古
香消瓦鼎火猶溫
展讌竟日渾忘倦
醉後歸來已夕昏

徐州夜泊與白伯望話舊

繫纜南徐洪上頭
已同白傅共仙舟
一燈聚話當時事

數酌能消滿目愁，夜永相將長至候。
寒深偏重敝貂裘，起來醉看中天月。
曾照當年燕子樓。

宿京口客樓

舟行兩月歲將殘，牢落窮途雙鬢寒。
數卷圖書投夜宿，一天風雪阻江干。
驅馳自媿聞雞舞，不寐重將瘞鶴看。
鐵甕城邊黃葉寺，鐘聲依舊出林端。

春盡過虎丘竹亭逢王百谷諸友同聽禪誦

三月韶華日換新，一番花事已成陳。
閒過竹徑題新句，

偶入山房逢故人
誦罷楞嚴停拂塵
靜修禪觀寂聞塵
此時正合樊川句
古寺風煙又一春

馮武選正伯攜榼過訪次韻一首

新晴初旭射簷楹
數卷圖書一几橫
自喜客來茶正熟
忽聞鳩向竹間鳴
塔縣池沼排山影
風奏松濤隔水聲
君欲問余真樂處
身心安穩夢魂清

得曾孫志喜

卜居虎阜近南村
犬護踈籬晝掩門
自覺老來容易老

喜聞孫又報生孫眼看四世家庭慶架有遺書父祖存
十月江南天氣好試沽春酒酌金樽

秋興

去歲今朝候駕還追隨鴛鴦集賢闕九重殿啓迴仙仗
五色雲中覲聖顏一代盛儀文郁郁千官鳴珮玉珊珊
歸來獨卧山莊上半掩柴門水一灣

孫修撰以德夜訪梅花樓因余熟睡而去曉起作
詩貽之

雨收月出四山沉獨擁吳綾入夢魂
高處鐘聲懸碧落
一牀林影過黃昏
毘耶小閣燈初燼
閬苑仙人夜扣門
醉卧不知清露冷
曉看屐齒破苔痕

憶羅太史

翰苑當年第一仙
訓儲遺疏至今傳
銀魚焚却歸蓮洞
寶訣書成秘草玄
獨往名山非慢世
偶攜開士即逃禪
高岡孤鳳今何在
徙倚西風思惘然

築園于虎丘南村池中忽移塔影志喜

幾年浪跡寄江湖歸葦田園半已蕪
環沼倒懸新殿宇浮丘翻映小蓬壺
分明馬遠晴巒景絕似南宮煙寺圖
真覺世心消欲盡閉門羞復看陰符

政府申公和詩

欲從野寺開新社故向郊園剪舊蕪
地近青山來白鳥人同秋月在水壺
蓮花七級涵空影祇樹雙林入畫圖
今日潛夫能雅詠不須著論學王符

示龍兒會試禮部

攜家昔共住長安歸葺田園數載寬汝復去游雙鳳關
親猶縣念五雲端家聲好繼書香在行色須知道路難
聖主好文方尚少萬言擬合上金鑾

家弟乞聞喜而賦詩

清朝林下幾人歸吾弟翻然早拂衣清草池醒蝴蝶夢
紫荊花伴鵲鳩飛珣舊業名仍在求點山居蹟已非
旬日一來猶恨晚笑他頭白戀輕肥

王珣王珣何求何
點皆兄弟也俱有

別業在
虎丘

子悱弟歸約余旬日一至虎丘山莊而連雨愆期
殊覺䟽遯偶閱蘇長公迎子由之詩追和其韻招
之

山深雨濕木棉裘五月如秋卧虎丘訂約愆期虛別業
經旬疑復殫他州邯鄲夢醒君初返漢上衿題我獨留
行樂及時須記取莫教人訝未真休

蘇公云幾人
林下是真休

初夏晴明家弟子悱同從弟子長過余山莊小酌
既登虎丘憩茂林修竹下時黃鳥嘒聲山僧供茗

而詠歌言旋宛然春風沂水之樂也徐步溪頭惟
見一川夕照目送歸舟又豈無黯然之別思哉返
卧鶯羣閣恨無詠以紀之次早子悱詩至遂走筆

和韻

蘇家兄弟是前身重結今生未了因作伴追游山寺路
乞閒能樂故園春樹陰團蓋堪圍坐鳥哢嬌聲解喚人
夕照一川舟去遠還山惟有白雲親

題虎丘梅花樓

昔曾東閣賦梅花此日山樓感歲華
滿目羣峯雲萬疊
一林殘雪樹交加
風來塔院遙聞磬
手汲懸泉試鬻茶
知是英賢舊游地
至今題處有籠紗

午門朝見

曾向天門十上書
無媒空自待吹噓
羞將白髮游燕市
猶著青衫謁帝廬
強起彈冠慚貢禹
誰憐作賦似相如
聖王尚少吾年老
肯住長安久借居

雪中元老送酒米

彤雲密布雪漫漫擁舊青綾獨自看未得掃門同魏勃
只宜僵卧學袁安香杭分惠來厨傳法酒應知出大官
賦就河東無一薦任教先達笑彈冠

徐侍講送鹿脯

深山昔與鹿同游閬苑今朝薦脯脩亟問敢云勞孔伋
拜嘉真自媿裴休

休有人饋炙鹿辭云既食且不足食鹿脯後何以繼

長安往事

成蕉夢旅館嚴寒擁麕裘何日得歸尋樂處長林豐草
聽呦呦

得舍弟書至

離家三月苦無書有客來傳愛弟貽秋老鵲鴿栖未穩
天寒鴻雁到偏遲平安深憫義之帖消息真傳杜甫詩
更喜阿咸題數字琳琅玉樹慰吾思

送鄒吉甫左遷南北部幕

鄒陽再逐下咸英獨倚孤忠向舊京
瑣闥空餘麻草在
高岡無復鳳凰鳴
白雲司裏脩封罷
玄武湖邊緩轡行
不久天書還內召
聖王知必問蒼生

遣興

一甌新茗玉河泉
几上香殘午夢還
風墮手書知困頓
鳥鳴簷樹任間關
地偏心遠門如水
事少官閒日對山
盡道長安塵十丈
可容飛到小窻間

放朝出城至署中

旅食長安久未還
朝鐘初徹下鵷班
九重天迥迴仙仗
五色雲開覲聖顏
廩祿虛糜慚住久
踈慵成習喜官閒
不防隨例趨朝謁
拄笏郊南又看山

秋日早朝值傳臚有感

銀漢沉沉曙色微，殘星數點鴈南飛。
黃羅床迥金龍繞，翠羽旗翻玉露晞。
錫命傳宣天語近，拜瞻遙接尚方輝。
寸心真乏絲毫補，媿著先朝舊賜衣。

先祖先父俱有賜衣

志感

慚著烏紗映白頭，老年日侍翠雲裘。
悔從去歲辭家出，強自隨人學宦游。
滿目風塵思怨鶴，一生辛苦媿眠鷗。
促歸頻有兒書至，好葺茅茨待乞休。

袁駕部考績還南都

奏績趨隨右掖垣又乘匹馬向長干從知袁紹名推重
莫笑文同老得官久別甞逢今又別小寒初過正嚴寒
行行不久天書至召入承明侍禁鑾

內苑

內苑秋深景物清黃金題榜日晶晶龍舟錦纜瓊華繞
羽節紅旂翠殿行萬頃瑤波圖畫色一羣嬌鳥管絃聲
昔年閣直談玄處午夜雲中天樂鳴

獻俘侍班

聖主親臨五鳳樓，千官分列擁貔貅。
鸞簫合奏鈞天響，虎衛森嚴御道周。
事異魯公居泮水，俘同光弼獻懷州。
華夷一統昇平盛，願誦鐃歌拜冕旒。

夢歸

昨夜西風夢到家，不知身尚繫天涯。
孤身作客渾如寄，愁緒平添亂似麻。
遙憶故園三徑在，回思脩竹萬竿斜。
起來霜馬催行處，猶整朝衣入翠華。

韓太史再送羊脯

同學如君最妙年優柔雅度玉堂仙文章似昔推韓愈
太史于今媿孟堅亟饋有勞頒鼎肉踏疏無夢媿前賢
感君不忘山陽社默坐時歌既醉篇

上林齋宿

上苑鐘聲出景陽玉河橋畔月蒼蒼瞑鴉栖定喧初息
至夜相將漏更長自媿衰年通仕籍強隨鷓鴣侶綴班行
心清元自無塵想手撥爐灰細續香

思歸

花事闌珊春又殘，好懷無著帶圍寬。
故山園上荒三徑，采育村中寄一官。
親舊常思難聚晤，兒書時獲報平安。
何時早辦歸舟去，半掩柴門竹數竿。

乞休

二載趨朝侍冕旒，秋來三疏乞閒休。
平生志願終難遂，此日功名念已收。
莫道百年過太半，且從三徑任閒遊。
歸家自喜身還健，統膝孫曾笑白頭。

和申相公送行

兩年端笏一微臣
予告今朝解珮簪
無復京華塵滾滾
不聞長樂漏沉沉
回瞻紫闕遠逾遠
歸向青山深更深
從此閉門惟靜坐
有時乘月一微吟

附申相公詩

早學相如賦上林
一官未久竟抽簪
自憐白首耽雲卧
不逐金門混陸沉
松菊長依三徑好
蒹葭獨釣五湖深
倦游我亦思吳苑
惜別那堪更越吟

瀕行以詩見投疊前韻奉荅

青衿藝苑舊知音
白首交情重盍簪
君向明時甘寂寞
余慚厚祿尚浮沉
閒居自覺風波穩
高卧偏知雨露深
遙憶虎丘山寺裏
月明誰與共行吟

葺園

園廬重葺近山村
寂寂無人晝掩門
手植梭櫚看漸長
徑栽松竹喜猶存
盤無兼味樽常滿
几有餘香火尚溫
正是一番新雨過
任教庭砌長苔痕

元旦

丁亥

去歲今朝候掖垣
千官鳴珮五更寒
山窻此日唯高卧
天語無聞慶履端
拜謁先祠忙盥櫛
笑呼兒女共團圓
昨宵有夢居閒樂
不到金鑾白玉欄

寄申相公

數載辛勤兩鬢蓬
歸來三月又春風
恩私圖報愁無地
知己平生獨有公
老我自怡三徑樂
扁舟時泛五湖東
投閒自識林間趣
回首京華是夢中

山亭雨坐

鳴鳩乳燕繞簷飛
灌木陰陰結夏幃
倚杖去看新水漫
經旬來覺故人稀
當年館閣爭求識
此日山莊靜掩扉
舊事欲談誰與共
一簾梅雨自霏霏

試茶鬻筍欣然一飽喜而賦詩

青山南畔久為家
曲曲陂塘樹樹斜
鄰叟供來龍塢筍
山童時焙虎丘茶
舊時梁燕營新壘
開到薔薇又落花
此日山林聊自適
鶴瓢鳩杖足生涯

寓目自遣

梅子肥時雨乍收
園林夏五景偏幽
池邊翠鳥兼黃鳥
屋上晴鳩喚雨鳩
字學永和修禊帖
茶傾宣德小磁甌
一生辛苦成何事
待得安閒已白頭

嘉禾沈王二憲長過訪

讀罷楞伽掩竹扉
山中忽枉故人車
共談當日曾游處
回首東風廿載餘
見說買山同謝朓
還期薦剡似相如
二君方繫蒼生望
未許明時擬卜居

園亭

園亭梅雨一番過樂事偏多俗事無
蘭蕝筆鉤筇竹帖羲之書水磨香蕕博山鑪
一枰棋了茶初熟頃刻花開酒已酤
正欲北窻支枕卧又看池上浴鷗鳬

自遣

開窻四望意欣然插遍新秧綠滿田
乍暖又寒芒種候啓晴還雨熟梅天
池邊細浪知魚樂草長平坡看鴨眠
自笑老來生計拙踈慵真適有閒緣

雨晴書懷

一窻晴旭映池塘綠樹成陰覆草堂
新竹萬竿鳴珮玉
踈松滿耳奏笙簧
光流几簟新鋪地火焙薰籠近製香
如此清閒受清福何須復夢殿東廊

新竹數百竿欲置小樓未就賦詩自遣

綠遍園亭雨乍收
籜冠野服稱行游
時攜拄杖穿紆徑
欲傍新篁著小樓
天肯與閒還與健
我真無累亦無求
詩逋畫債常堆積
興到揮毫倦即休

晏起

日上山窻猶晏眠起來無事坐茅簷不聞門外催租吏
時泊溪頭問字船飯煮長腰香稻粒魚烹縮項細鱗鯿
鑪薰初燼茶甌歇白石燈明繡佛前

曝背

獨卧山中閱歲華白雲雞犬護桑麻避人只為身先嬾
曝背因知日易斜數酌舊藏燕市酒一甌新焙小春茶
回思京邸懷歸日不覺年餘已在家

夜榻驚羣閣不寐

卧抱白雲山幾重山深野碓隔溪春世心消滅思酣睡
年力衰遲覺意慵半夜月明漁市鼓五更風動虎丘鐘
江湖十載空奔走乞得歸閒兩鬢鬆

申政府寄書歷至

歸來重葺虎丘居地僻時迴長者車喜見春王新歲歷
欣看厚祿故人書公孫延士猶開閣玄晏窮愁自閉廬
莫問踈慵只如作文園終合卧相如

虎山橋玩月

光福西來水繞盤虎山橋月在林端霏霏細霧人初散
拍拍新醕酒亦寒石塔影斜生夜氣盡船停處起微瀾
分明一幅南宮景正好蓬窗倚檻看

溪雲閣為歐陽子賦

歐陽曾築醉翁亭白下雲孫寄一楹新水平添桃葉渡
飛雲常繞石頭城沿流夕照堪垂釣隔浦涼生唱濯纓
書卷茗薰消永晝秦淮原不讓蓬瀛

春日書懷

山園雨過徑如酥，倚杖行游不用扶。
載酒船停人問字，賣花聲歇鳥提壺。
醉圍紅袖閒揮洒，嬾畫青山有積逋。
鸚鵡一雙飛並浴，滿池新水長新蒲。

玉蘭堂即事

玉蘭堂坐靜無譁，小盞闌蘭著數花。
載得寶華山上水，試烹羅峽雨前茶。
手揮玉麈棋聲歇，風動湘簾竹影斜。
投老身閒心亦靜，喜無塵土是京華。

過石蓮莊

拂衣歸卧虎丘居嘗憶吳淞江水湄不到石蓮經歲久
重來岸柳綠陰垂眼前田畝皆新主村上人家異昔時
獨有當年垂釣處至今橋畔有茆茨

自適

虛堂高敞四垂簾散髮濡毫學素顛
拈首作羹供午餉
籐床支枕且安眠近於世味看來澹
久悟玄機覺有緣
一事不關心似水
鑑薰茗椀自年年

雨過書懷

一番雨過樹扶疎
湘簟生涼竹榻虛
心靜不關身外事
睡酣時墮手中書
齋頭橫設天然几
門外頻還長者車
數載京華塵似海
何如今日誦閒居

七夕

抱病忽經三十日
開簾驚見月垂鉤
雙星又向河梁度
獨卧遙聞笛韻悠
雨過蕭齋涼思襲
夢回虛枕簟紋流
追思白首承歡處
腸斷西風十五秋

虞山桃花澗

海虞山與白雲齊萬樹桃花古澗磯
漫往慚非晨肇輩沿流疑入武陵溪
前村小塢聞雞犬作伴隨身少鹿麕
共領夕陽奇絕處青帘斜映畫橋西

中秋夜見月華

橫笛牆東三兩聲閒庭獨坐晚涼生
九秋今夜平分處圓月當空幾倍明
風斂卿雲呈五色漏催銀箭已三更
洗杯更酌登樓望撫景懷人無限情

初冬讀趙文敏公詩可愛追次其韻

雨歇雲輕漏日光
庭前橙橘已經霜
故人遠寄新頌歷
瓦鼎時焚內府香
自覺心閒身亦健
何妨晷短夜偏長
興來秉燭窻前坐
隨意欣然榻硬黃

附文敏詩

平生詩句領流光
絕愛初冬萬瓦霜
楓葉欲殘看逾好
梅花未動意先香
暮年自適何妨退
晚景無營亦是長
况有小兒同此趣
一窻相對弄朱黃

借榻楞伽寺對上人房

奔馳久不到楞伽來入山中日又斜
淨室焚香僧入定
雨窗閒話燭生花百年心事三更夢
十載江湖兩鬢華
依舊鐘聲禪榻畔曉催新汲試烹茶

次韻答張孟孺

我歸林下歲將終君獨承恩出漢宮
喜有高才同子建
無心執戟侍楊雄
宜難勲業凌烟上只欲精研書史中
惠我驚人詩句好興懷長悵故人風

春來久雨窻前石菖蒲忽開數花采供繡佛齋
雨晴新綠上窻紗石上昌陽著九花靄靄輕浮雲欲動
盈盈清淺水參差摘來服食依仙傳供向山齋閱歲華
歸老心閒無俗慮一燈相對禮毘耶

除夕 丁亥

窮冬快雪喜時晴乞得歸閒一老身繞膝孫曾娛晚景
圍爐樽酒守庚申今宵歲次將更候明日年華是七旬
秉燭酣歌須達旦早裁詩句慶新春

文氏五家集卷十三

欽定四庫全書

文氏五家集卷十四

明 文肇祉 撰

錄事詩集

五言絕句

春日

雨餘春水漲岸岸溪流平
玄鳥今朝至倉庚樹底鳴

舟中曉望

夜泊葑溪上朝過黃石橋波光浮潏潏紅日起層霄

新燕

燕來營舊壘簷底雙雙語柳絮舞閒庭杏花三月雨

江樓聞笛

閒居人事少獨坐小樓中五月江深處梅花落晚風

晚眺

一望江天濶風生蘆荻洲平沙羣鴈落天際有歸舟

十月

昨夜朔風寒今朝雪花舞起來
盥櫛餘條忽日過午

楞伽寺

楞伽湖上寺修竹萬竿斜
禪誦方初定空中散雨花

石湖莊

卜築越來溪間是王猷室
默默娛道言牆頭露山色

袁氏列岫樓

袁安結層樓庭植千竿竹
遠岫列窻中人占丈人屋

西莊

西莊鄰古寺紅杏出牆頭驕馬嘶金勒成羣作冶游

雞鳴山

獨倚憑虛閣紅樓暝日開忘機雙白鶴閒步啄蒼苔

秣陵秋色

水深桃葉渡溪上晚潮生岸幘樓頭望蒹葭落日明

漂母祠

淮陰古驛西溪上有荒祠一飯王孫後芳名千古垂

分水龍王廟

廟貌神龍古徂徠據上游泉源七十二南北水分流

黃金臺

追想燕昭意懸金結士心當時四至士豈盡為黃金

盧溝曉月

盧溝缺月升野店早雞鳴不見人行蹟惟聞車馬聲

金臺夕照

落日閣西山晚霞呈五色倒影入廟中樓臺燦金碧

西山玉泉亭

湖膜玉泉西泉亭傍石磯呂公祠洞古耶律楚材題

署中自遣

老作宦遊人荒村寄一身鳥啼花亂落又是一年春
致政

貪位懷百憂何如歸去好莫嫌得官遲但願休官早
山莊

歸卧虎丘莊無縈日自長雪深人蹟少溫火煮茶香

春雨遣懷

細雨又春分魚吹水面紋一般啼鵲鳥不是上林聞

雨中登虎丘

春陰連一月啼鳥怨東風一望劍池上樓臺煙雨中

曉山

缺月已流西登臺入翠微四山空翠滴露下濕人衣

中秋夜虎丘翫月

歌聲合簫管明月正當頭醉倚千人石山僧供茗甌

雪霽登山

雪晴山寺寂攜酒一凭闌
悟石軒前望瓊樓玉宇寒

林居自述

歸老意安閒暮年聊自適
靜坐竹窓中一日如兩日

六言絕句

十二月

端月上元將近高燒銀燭傳
卮酒醒滿庭明月雪殘寒
勒梅枝

陰雨春分時候柳塘水綠
如油燕子歸尋舊壘杏花開

滿牆頭

今日正逢穀雨呼童試焙新茶池上數株垂柳水邊開
遍桃花

雨過清和時節牀頭蠶已三眠柳絮漫空作雪沼中荷

夏五葵榴滿目昨朝已過端陽雨歇一番涼思家家揷遍新秧

炎暑蒸人如甑荷亭拂拭桃笙門外寂無車馬卧聽高

柳蟬鳴

昨日金風乍起今宵大火西流卧看牽牛織女歡娛又
一年秋

雨霽中秋氣爽今宵明月當頭山上游人如蟻盡船簫
鼓中流

去歲賜糕闕下今宵歸卧山莊記得潘邠詩句滿城風
雨重陽

霜落溪邊蘆葦初冬紫蟹輸芒新釀牀頭酒熟山莊稻

已登場

忽報仲冬時令喜逢至日陽生回視車塵馬足何如几

淨窻明

臘月午門賜讌歸來高卧繩牀又是一年將盡茅簷竹

几焚香

七言絕句

雪晴

茅簷晴旭減寒威乾雪隨風上竹扉漏泄春光占柳色

爭枝啄雀墜驚飛

白頭鳥爭枝

落日西風竹樹幽
閉門閒坐自悠悠
一雙小鳥爭飛墜
老不相知媿白頭

罨畫溪

短棹輕舟罨畫中
春深花片滿溪紅
眼前只少漁郎引
疑有桃源路可通

又

陽羨羣山紫翠重山迴路轉一溪通
沿流點筆翻成畫
不道身先在畫中

鳳凰臺懷古

鳳去臺空玉樹殘登臺一望俯長干
秦人誰識千年後
終古皇畿奠石磐

春

日煖茅簷燕影翻牆頭一樹杏花繁
盡垂簾幙裁新句
何處鞦韆笑語喧

新夏

自掃松枝試煮茶
四簷新綠映窻紗
剛思無計留春住
又見翻堦紅藥花

綠牡丹

姚黃魏紫鬪鮮新
獨此名花占晚春
若使移從金谷裏
倚闌疑是墮樓人

過金山

獻賦留都四度虛
扁舟空又載琴書
舉頭媿望江天閣

只恐名山亦笑余

江上小亭雨坐

吳淞江上雨霏微
雨過江邊隱隱雷
愛得遠天雙白鶴
青山掩映却飛回

丹陽道中

上書無路達承明
又向丹陽郭裏行
買得小舟風又逆
顰依村野待潮生

與杜與言談秣陵秋意

夕花開向晚風前花近黃昏晚更妍記得長干行樂處
紗幮月伴玉人眠

江頭晚眺

十月江南鱸鰕肥新春晚稻帶香炊欣然一飽江頭望
楓落前村露酒旗

親友送別

東風拂拂柳千條客路三千去更迢再把一杯行色酒
片帆風雨過楓橋

杜玄慶齋供盆蘭餅梅可愛各圖一幅貽之

幽蘭空谷萬千叢何似新栽小盎中一蕊二花三四葉
分明一幅所南翁

折得梅枝蝕鮮斑古餅瓊蕊勒春寒夜來無限相思發
點筆翻成畫裏看

春畫

柳花飛舞上簾旌春暖池塘魚子生獨坐小窗無客至
柔間戴勝兩三聲

玉河春色

東風御柳萬株斜
白玉河邊暎曉霞
報道今年春色早
日邊紅杏已開花

十五夜出場

棘闌十度鎖重門
擊柝聲中欲斷魂
文字五千初寫就
冷風吹月又黃昏

舟中望太白樓

昔年曾此醉中豪
太白危樓百尺高
今夜扁舟空悵望

依然月色照宮袍

舟中望曉霞

熙微曉色碧天澄
帆帶青山樹裏行
好是楞伽湖畔寺
上方茶磨列蒼屏

鷺

水田漠漠鷺成羣
風裊寒絲靜不驚
何事衝烟忽飛去
青山時見白雲生

舟過桃源夢故妻

伯鸞時憶孟光賢夢裏重逢淚自潛二十四年長別後
誰知又是布衣還

清河口

昔年河口水橫下百丈難牽上水舟今日歸來非舊路
布帆無恙自安流

舟次儀真有感

歸帆數幅又真州記得隨親送北游回首秋光逾七載
傷心滿把淚交流

京口

北固山圍鐵甕城又攜書劍度江濱
寄言關吏無須問不是棄繻終子雲

雪夜不寐

雨雪霏霏卧擁裯
篝燈獨自數更籌
樊川詩句關吾意
未見功名已白頭

自嘆

劉向傳經苦自知
南圖北走媿奔馳
場中三十餘三日

博得星星兩鬢絲

得官有感

辛苦奔馳四十年
今朝一命拜園官
可憐薄祿縻人得
從此紅塵撲馬鞍

趙邑博仁甫會試

瘦馬西風古道斜
送君回首各天涯
種成桃李門牆盛
又向長安看杏花

釣鰲處

秋風吹雨晝陰陰
畫舫青簾映遠林
俛仰舊游興感慨
百年空負釣鰲心

歸山莊有感

歸來重卧虎丘莊
浩蕩君恩不敢忘
坐享餘年娛晚景
答天惟有淨焚香

聞蛙

年來卜築虎丘莊
日夜笙歌到耳傍
莫道貧家無鼓吹
蛙聲也自鬧池塘

貫酒

虎阜山前屋數椽
赤欄橋下塔斜懸
偶思小飲沽村釀
晚市魚蝦正泊船

過元上人山房

禪房寂寂長苔紋
蘿薜陰陰鎖白雲
試剪芭蕉如貝葉
研朱點露寫經文

歸來

歸老重修塔影園
花能含笑鳥能言
只求身靜心安好

不羨門前車馬喧

洗硯

池邊柳色淡鶯黃
雨過雲行漏日光
睡起呼童頻洗硯
一泓春水墨花香

沈道人索書

千古驚羣說右軍
山陰道士愛黃庭
沈休亦欲籠鶯至
為寫淮南相鶴經

索字

几淨窻明照繭光日臨閣帖晉諸王今朝博得門如市
也勝傭書日幾行

送友人

綠樹溪邊日暮雲片帆無繫帶斜曛明朝三月逢三十
未送春歸先送君

鷺羣閣

鷺羣閣下水泠泠生見青山上畫屏午睡起來無客至
自臨南牖榻黃庭

朱汝脩送貝葉

貝葉經文一卷餘故人惠我供齋居芭蕉試剪畚新樣
滴露研朱手自書

反舌

年來月令也無憑五月枝頭反舌鳴萬語千言為誰訴
攪余殘夢不分明

林堂獨坐

山中九月下霜華楓葉紅於二月花坐愛林堂幽趣好

焚香拂几讀楞伽

張伯起畜鴛鴦數十於池客來呼之即至

自昔羲之與魯望羣鴛鴦關鴨滿春江清河公子無他好
池上鴛鴦三十雙

新柳

陌上東風嘶紫騮淡鴛黃色弄輕柔去年此日長安道
萬縷煙條拂御溝

二月

二月園林雨乍晴
茅簷初旭映窗明
東風吹綠溪邊草
桑柘葉青蠶子生

泊問潮館

舟泊溪頭夢不成
忽聞雲裏度鐘聲
起來自倚蓬窗看
夜半月明潮未平

讀南華

開遍桃花柳拂煙
鴛鴦日煖傍沙眠
焚香靜坐心如洗
細看莊周齊物篇

對奕

水閣新鋪枕簟涼
風吹送芰荷香
客來解帶簾前坐
棋局閒消白晝長


新秋聞蛩

昨夜秋聲起樹間
早看梧葉滿庭前
一番細雨生涼思
繞砌蛩聲到枕邊

題卧雪圖

袁安僵卧畏千人
車馬臨門慙問情
當日史官何忘事

洛陽令尹不書名



文氏五家集卷十四